

Gerencia di Parke Nacional Arikok a pidi referendum, algo poco usual

ORANJESTAD – Mayoria di e trahadonan di Parke Nacional Arikok (PNA), a eligi SEPPA como e sindicato cu ta representa nan durante un referendum cu a tuma luga na departamento di Mediador di Gobierno.

E biaha aki, ta e mesun dunado di trabou, kiemen gerencia di e parke, a pidi pa bin cu e referendum aki. Mediador di Gobierno, Anselmo Pontilius, a declara na Bon Dia Aruba cu no ta usual cu e mesun doño di trabou ta pidi pa convoca un referendum; pero pa ley esaki ta posibel. Considerando cu tin dos sindicato cu ta representa e trahadonan di PNA, esta SEPPA y TOPA, gerencia di e parke a pidi referendum pa determina cual sindicato ta esun mayoritario. Ya cu gerencia di parke kier atende cu e sindi-

cato mayoritario.

Ambos sindicato, tanto SEP-PA como TOPA, a participa den e referendum aki, caminda un total di 45 trahado por a haci uzo di nan derecho di voto. Un total di 42 di nan a haci uzo di e derecho aki, di cual 30 a vota pa sindicato SEPPA y 11 a vota pa TOPA; mientras cu uno no a scoge niun sindicato.

Esaki kiemen cu SEPPA a haya e mayoria, y consecuentemente e dunado di trabou tin un obligacion di acuerdo cu e ley di contracto colectivo (CAO) pa negosha un CAO cu e sindicato cu tin e mayoria di e trahadonan afilia. No tin un CAO pa e trahadonan ainda, mas cu SEPPA a entrega uno.

Sr. Pontilius a bisa cu aworaki e partidonan tin cu bay mesa hunto cu SEPPA pa nan mira con nan ta bay atende cu e negociacion di CAO y tambe

cu algun otro reclamo cu tin di haber cu nan posicion huridico.

Igualmente, el a splica cu e mesun ley di CAO ta indica cu e dunado di trabou no por haci un distincion y duna menos na e trahadonan di loke ta poni den e CAO, a pesar cu e trahado ta afilia na e sindicato minoritario cu no a negosha cu nan. Den e caso aki, tur trahadonan di parke lo beneficia di e resultado di e negociacion di e CAO. Gerencia no por duna menos na otro trahado. Sr. Pontilius no ta kere cu niun dunado di trabou lo kier bay den e direccion ey, ya cu esaki ta crea tambe decepcion y mal contento na pia di trabou.

*Correccion: 'E articulo aki a sali riba front page di nos edicion di ayera, sin cu el a keda publica'. Redaccion.

